

Sumáriu Kazu

Tribunál Judisiál Primeira Instânsia Baukau
Jullu 2023

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulnerable. JSMP afirma la iha justifikasi saun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instânsia Baukau

1. Totál kazu ne'ebé JSMP monitoriza: 41

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	23
Artigu 145 Kódigu Penál (KP)	Ofensa ba integridade física simples	3
Artigu 207 KP	Kondusaun sein karta	1
Artigu 154 (KP) & artigu 2, 3, no 35 (LKVD)	Maus-tratus ba kónjuje	1
Artigu 145 (KP) & artigu 2, 3, no 35 letra (b) (LKVD) no Artigu 20 (1), artigu 2 (2 alinea f) Lei Arma Brankas	Ofensa ba integridade fizika simples ho natureza violénsia doméstika no arma brankas	1
Artigu 259 (a) KP	Danu agravadu	3

Artigu 157 KP	Ameasa	3
Artigu 177 (2) KP	Abuzu seksuál ba menór	2
Artigu 140 KP	Omisídu negligente	1
Artigu 140 KP no Artigu 207 KP	Omisídu negligente no kondusaun sein karta	1
Artigu 20 (1), artigu 2 (2 alinea f) Lei Arma Brankas	Arma brankas	1
Artigu 252 (1) Alinea d, f no I KP	Furtu agravadu	1
		41

2. Totál desizaun ne'ebé JSMP monitoriza: 30

Tipu desizaun	Artigu	Númeru
Pena prizaun	Artigu 66 KP	1
Suspensaun ba prizaun nia ezekusaun	Artigu 68 KP	6
Pena multa	Artigu 67 KP	20
Suspensaun ba prizaun nia ezekusaun no indemizasaun sívil	Artigu 68 KP	1
Pena multa no omolga dezistensia keisa	Artigu 67 KP	1
Absolve		1
Totál		30

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 11

B. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0008/23.MNMNT
 Kompozisaun Tribunál : Singulár
 Juis : Dra. Sribuana da Costa
 Prokuradór : Dr. Julio da Silva Correia
 Defeza : Dr. Germano Guterres Ramos
 Desizaun : Pena prizaun fulna 1 suspende ba tinan 1

Iha 04 Jullu 2023, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AFdJS nu'udar membru FFDTL hasoru nia feen, iha Munisípiu Manatuto.

Akuzasaun prokuradór

Prokuradór akuza katak iha, 27 Janeiru 2023, iha oras tuku 03:00 madrugada, arguidu tuku dala ida iha lezada nia kotuk laran, kaer lezada nia kabaas no dada lezada sai husi kuartu no tolok lezada, arguidu kontinua foti kadeira atu baku lezada maibé la konsege tanba lezada halai, arguidu baku rahun kadeira no tuda rahun telemovel marka Samsung ida. Alende ne'e arguidu tuku dala rua iha lezada nia ulun parte karuk, tuku dala ida iha lezada nia kanuruk rezulta lezada monu ba rai, maibé lezada konsege hamrik hodi halai ba subar iha uma kotuk. Antes agresaun ne'e, arguidu ho lezada diskute malu kona-ba lezada deskonfia arguidu iha relasaun ho feto seluk, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak fila husi festa ho kondisaun lanu mak lezada deskonfia tan ba feto seluk halo arguidu nervozu mak halo agresaun hasoru lezada tuir faktu sira iha akuzasaun. Iha 26 Fevereiru 2023, perante família rua arguidu ho lezada di'ak malu fali ona no arguidu mós husu ona desculpa ba lezada ho osan US\$200.00, arrepende nia hahalok, foin primeiravés mai hatan iha tribunál nu'udar FFDTL ho vensimentu kada fulan US\$410.00.

Alende ne'e lezada kontiua konfirma faktu hotu iha akuzasaun no deklara katak agresaun ne'e rezulta lezada nia ulun hetan bubu, lezada la ba konsulta maibé sosa de'it ai-moruk amoxilin no paracetamol hodi konsume no konfirma mós ho arguidu ninia deklarasau katak depoisde akontesementu ne'e sira diak malu ona no arguidu la komete tan aktu seluk hasoru lezada to'o agora.

Alegasaun finál

Prokuradór haktuir katak akuzasaun prokuradór prosedente provadu bazeia ba arguidu nia deklarasau no lezada nia konfirmasaun ba akuzasaun, di'ak malu ona perante família sira atu prevene arguidu nia konduta iha futuru husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak arguidu konfesa faktu sira hotu iha akuzasaun, di'ak malu ona ho lezada, arrepende nia hahalok no foin primeiravés mai hatan iha tribunál. Tanba ne'e husu ba tribunál atu fó pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia kotuk laran, kaer lezada nia kabaas no dada lezada sai husi kuartu no tolok lezada, arguidu kontinua foti kadeira atu baku lezada maibé la konsege tanba lezada halai, arguidu baku rahun kadeira no tuda rahun telemovel marka Samsung ida. Alende ne'e arguidu tuku dala rua iha lezada nia ulun parte karuk, tuku dala ida iha lezada nia kanuruk rezulta lezada monu ba rai, maibé lezada konsege hamrik hodi halai ba subar iha uma kotuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

2. Krime ofensa ba integridade fizika simples

Nú. Prosesu	: 0188/22.BCBCV
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Sidonio Maria Sarmento
Desizaun	: Pena multa US\$60.00

Iha 04 Jullu 2023, Tribunál Judisiál Primeira Instânsia Baukau prezide julgamentu leitura sentensa ba kazu ofensa ba integridade fizika simples ne'ebé envolve arguidu LdCFF, hasoru Lezadu FBdC iha suku Tirilolo, Postu Administrativu Baukau Vila, Munisípiu Baukau.

Akuzasaun prokuradór

Prokuradór akuza katak lezadu nu'udar membru husi arte marsiais PSHT no arguidu nu'udar membru ida mós husi arte marsiais IKS. Iha 16 Dezembru 2022, iha oras tuku 19:40 kalan, arguidu tuku dala tolu iha arguidu nia tilun hun parte karuk no loos no tuku iha lezadu nia ibun kulit dala ida rezulta kanek no raan sai.

Prokuradór akuza arguidu kontra artigu 145 KP kona-ba ofensa ba integridade fizika simples ho nia moldura penál to'o tinan 3 ka multa

Produsaun ba prova sira

Iha prosesu julgamentu, arguidu deklara katak arguidu tula nia primu no lezadu lao korta dalan ne'e mak arguidu hakilar dehan sees, maibé lezada hatan "be nusa" ne'e mak arguidu tun husi motor ho tuku kendas lezadu dala rua iha tilun hun parte karuk no loos, tuku dala ida iha lezadu nia ibun kulit, arguidu nu'udar estudante arrepende ninia hahalok no foin primeiravés mai hatan iha tribunál.

Alende ne'e lezadu kontinua konfirma faktu hotu iha akuzasaun no deklara katak lezadu iha estrada sorin, bainhira arguidu liu ho motor mak hakilar lezadu rona hanesan tolok ne'e mak lezadu hatan "be nusa" Ho nune'e arguidu komete aktu ne'e hasoru lezadu.

Lezadu mós deklara katak, depoisde akontesementu ne'e ba keda ospitál hodi konsulta kanek ne'ebé mak kauza husi arguidu nia aktu, hafoin semana ida mak di'ak.

Alegasaun finál

Prokuradór haktuir katak bazeia ba prova sira hotu ne'ebé mak komete husi arguidu, en-jerál arguidu konfesa faktu hotu iha akuzasaun ne'e loos hotu no lezadu mós konfirma faktu sira iha akuzasaun katak arguidu halo agresaun hasoru lezadu. Tanba ne'e husu ba tribunál atu kondena arguidu ho pena prizaun fulan neen suspende ba tinan ida fulan neen.

Entretantu defeza haktuir katak, durante julgamentu la'o arguidu konfesa hodi rekoñese katak nia halo duni aktu violentu hasoru lezadu, nune'e mós arguidu nu'udar estudante ida. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu tuku dala tolu iha arguidu nia tilun hun parte karuk no loos no tuku iha lezadu nia ibun kulit dala ida rezulta kanek no raan sai.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

3. Krime kondusaun sein karta

Nú. Prosesu	:0036/22. BCSIC
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Albino de Jesus Pereira
Desizaun	: Pena multa US\$45.00

Iha 04 Jullu 2023, Tribunál Judisiál Primeira Instánsia Baukau prezide julgamentu leitura sentensa ba kazu kondusaun sein karta, ne'ebé envolve arguidu JdS hasoru Estadu RDTL, iha Munisípiu Baukau.

Akuzasaun prokuradór

Prokuradór akuza katak iha 19 Setembru 2022, iha oras tuku 08:40 dadeer, arguidu kondus kareta truk ho Xapa matrikula A 52-861 Tls, hodi tula ai-kakeu maran husi Triloka, bainhira to'o iha estasaun mina Maudare Baukau Vila Antiga, guarda floresta Sr. João Fernandes Ximenes hetan, nune'e imediata entrega ba Polísia. Arguidu konduz kareta sein karta kondusaun, maske arguidu registru tiha ona iha Diresaun

Transporte no Terrestre Munisípiu Baukau, maibé seidauk tuir ezame eskríta, oral no práтика.

Prokuradór akuza arguidu kontra artigu 207 KP kona-ba kondusaun sein karta ho nia moldura penál to'o tinan 2 ka multa.

Produsaun ba prova sira

Iha prosesu julgamentu, arguidu deklara katak nia kondus kareta ne'e la iha karta kondusaun, arguidu foin kondus kareta tinan ida no arguidu tuir ona ezame eskríta ba karta kondusaun maibé la pasa.

Alegasaun finál

Prokuradór haktuir katak, arguidu provadu komete krime ne'ebé imputa ba arguidu tanba ho vontade rasik práтика krime kondusaun sein karta tanba ne'e husu ba tribunál atu kondena arguidu ho pena multa.

Engtretantu defeza haktuir katak bazeia ba produsaun ba prova arguidu konfesa, arrepende ninia hahalok, foin primeiravés mai hatan iha tribunál no arguidu mós esforsu maka'as hodi hetan karta kondusaun, maibé la pasa iha prosesu teste, tanba ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu komete krime kondúsaun sein karta, mezmu arguidu rejistru ona iha Diresaun Transporte no Terrestre Munisípiu Baukau.

Bazeia ba faktu provadu sira ne'e no tetu mós ho sirkunstânsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

4. Krime maus-tratus ba kónjuje

Nú. Prosesu	: 0021/20.VQOSU
Kompozisaun Tribunál	: Koletivu
Juis	: Dra. Maria Modesta d. A. Viera, Dr. Evangelino Belo no Dra. Sribuana da Costa
Prokuradór	: Dr. Julio da Silva Correia
Defeza	: Dra. Laura Valente Lay
Desizaun	: Pena prizaun tinan 2 suspende ba tinan 2

Iha 04 Jullu 2023, Tribunál Judisiál Primeira Instánsia Baukau prezide julgamentu leitura akordaun ba kazu maus-tratus ba kónjuje ne'ebé envolve arguidu JRH hasoru nia feen, iha Munisípiu Vikeke.

Akuzasaun prokuradór

Prokuradór akuza katak iha data ne'ebé la apura maibé iha Setembru 2019, arguidu basa dala rua iha lezada nia hasan parte loos.

Tuir mai iha Maiu 2020, arguidu basa dala rua iha lezada nia hasan parte loos no karuk. Iha 16 Setembru 2020, arguidu ba iha lezada nia inan-aman nia uma, bolu lezada atu fila fali ba sira nia uma maibé lezada lakohi, arguidu basa dala lima iha lezada nia hasan parte karuk no basa dala tolu iha lezada nia hasan parte loos rezulta lezada monu ba rai. Arguidu tebe odamatan rezulta odamatan monu no kona iha lezada nia kabun leten, iha akontesementu ne'e lezada grida hela fulan lima, konforme relatório médico. Lezada sente moras no bubu iha hasan parte karuk no loos, kabun, halo lezada ta'uk, trauma nune'e ba halo tratamentu iha óspital.

Prokuradór akuza arguidu kontra artigu 154 Kódigu Penál kona-ba krime maus - tratus ba kónjuje ho nia moldura penal tinan 2 to'o tinan 6 konjuga ho artigu 2, 3 (a) 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak iha Setembru 2019, halo agresaun tanba lezada koalia barak loos kona-ba arguidu atu ba tula nia tiu boot husi Ossu ba Vikeke.

Iha Maiu 2020, arguidu halo agresaun tanba arguidu fila husi serbisu lori kareta, lezada la prepara hahan no lezada mós la iha uma. Iha Setembru 2020, arguidu halo agresaun tanba lezada ba nia inan-aman nia uma no ba festa la informa ba arguidu. di'ak malu ona maibé moris separa, arrepende ninia hahalok no foin primeiravés mai hatan iha tribunál no arguidu nu'udar motorista ho vensimentu kada fulan US\$150.00.

Alende ne'e, lezada kontinua konfirma faktu sira iha akuzasaun no deklara katak depoisde akontesementu ne'e sira rezolve ona perante família ho rezultadu dame malu maibé hela separa. Mezmu nune'e lezada nafatin konsidera arguidu hanesan lezada nia la'en, maibé defende arguidu.

Alegasaun finál

Prokuradór haktuir katak akuzasaun prokuradór prosedente provadu bazeia ba arguidu nia deklarasaun no lezada nia konfirmasaun ba akuzasaun katak arguidu halo tratamentu kruel hasoru lezada nu'udar nia feen tuir loloos arguidu mak proteze maibé pelu kontrariu arguidu mak komete fali krime hasoru lezada, tanba ne'e husu ba tribunál atu kodena arguidu ho pena prizaun tinan rua suspende ba tinan rua.

Entretantu defeza akresenta katak arguidu konfesa ba faktu sira hotu iha akuzasaun di'ak malu ona, arrepende ninia hahalok no foin primeiravés mai hatan iha tribunál. Tanba ne'e husu ba tribunál atu fó pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak faktu ne'ebé akuza ba arguidu provadu hotu bazeia ba konfisaun arguidu nian no konfirmasaun lezada nian.

Bazeia ba faktu provadu sira ne'e no tetu mós ho sirkunstânsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

5. Krime ofensa ba integridade física simples ho natureza violénsia doméstika.

Nú. Prosesu	: 0006/22. BCPVN
Kompozisaun Tribunál	: Singulár
Juis	: Dra. Sribuana da Costa
Prokuradór	: Dra. Remizia de Fatima
Defeza	: Dr. Albino de Jesus Pereira
Desizaun	: Pena multa US\$30.00

Iha 04 Jullu 2023, Tribunál Judisiál Premeira Instânsia Baukau Prezide Julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve,arguidu NAS hasoru nia feen, Munisípiu Baukau.

Akuzasaun prokuradór

Prokuradór akuza katak iha 02 Outubru 2022, iha oras tuku 16:00 lokraik, arguidu tuku lezada nia ulun no arguidu liman kukun kona lezada nia matan resulta kanek no raan. Antes agresaun ne'e, arguidu ho lezada diskute malu kona-ba lezada impresta osan iha Mikro Finansa moris rasik nian.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35 (b) no 36 LKVD.

Produsaun ba provas sira

Iha prosesu julgamentu, arguidu deklara katak faktu iha akuzasaun ne'e loos hotu, arguidu deklara tan katak antes ne'e lezada impresta osan Mikro Finansa moris rasik nian sira nain rua selu hotu ona. Lezada ba impresta tan la informa ba arguidu no osan na'in mai husu arguidu ne'e mak arguidu hirus halo agresaun, depoisde akontese sira hela separa to'o agora, oan nain hitu, arrepende ninia hahalok no foin primeiravés mai hatan iha tribunál.

Alende ne'e lezada mós konfirma faktu hotu iha akuzasaun no deklara katak osan primeiru sira selu hotu ona, impresta sigundu mak la informa ba arguidu no depoisde akontesementu ne'e moris separa ona ho arguidu to'o agora.

Alegasaun finál

Prokuradór haktuir katak akuzasaun prokuradór prosedente provadu bazeia ba arguidu nia deklarasaun no lezada nia konfirmasaun ba akuzasaun depoisde akontese sira la hela hamutuk ona, nune'e husu ba tribunál atu kondena arguidu tuir kulpa ne'ebé nia halo hodi prevene nia hahalok iha futuru.

Enkuantu defeza husu ba tribunál atu kondena arguidu ho pena admoestasaun ho konsiderasaun katak, arguidu konfesa, arrepende nia hahalok no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu tuku lezada nia ulun no arguidu liman kukun kona lezada nia matan resulta kanek no raan.

Bazeia ba faktu provadu sira ne'e no tetu mós ho sirkunstânsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loran durante loran 60. Tribunál mós fiksa pena alternativa durante loran 40 prizaun, bainhira arguidu la kumpri pena multa refere.

6. Krime ofensa ba integridade física simples ho natureza violénsia doméstika no arma brankas

Nú. Prosesu	: 0128/22.BCBCV
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Julio da Silva Correia
Defeza	: Dr. Germano Guterres Ramos
Desizaun	: Pena prizaun tinan 3 suspende ba tinan 3

Iha 04 Jullu 2023, Tribunál Judisial Premeira Instânsia Baukau prezide leitura sentensa ba krime ofensa ba integridade física simples ho natureza violénsia doméstika no arma brankas ne'ebé envolve arguida AAN hasoru nia la'en, iha Munísipiu Baukau.

Akuzasaun prokuradór

Prokuradór akuza katak iha 15 Setembru 2022, iha oras tuku 20:00 kalan, arguida uza katana hodi taa iha lezadu nia ain belar no tata lezadu nia liman rezulta kanek. Antes agresaun ne'e, arguida ho lezada diskute malu kona-ba arguida subar lezadu nia lampra, ho nune'e mosu agresaun ne'e.

Prokuradór akuza arguida komete krime konkursu kontra artigu 145 KP kona-ba ofensa ba integridade fizika simples ho natutreza violénsia doméstika ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD no artigu 20 Nu.1, 2 alinea f Lei Arma brankas.

Produsaun ba provas sira

Iha prosesu julgamentu, arguida konfesa faktu hotu iha akuzasaun no deklara liután katak depoisde akontesementu ne'e to'o agora seidauk di'ak malu no moris separa ona, arrepende nia hahalok foin primeiravés mai hatan iha tribunál.

Alende ne'e lezadu konfirma faktu hotu iha akuzasaun, lezadu ba hato'o keixa iha polísia no kontinua ba halo tratamentu iha sentru saúde no kanek ne'e suku pontu haat. Lezadu lakohi perdua ona arguida no agora sira moris separadu ona mezmu sira iha oan ida maibé sira hamutuk haree de'it labarik.

Alegasaun finál

Prokuradór haktuir katak iha produsaun ba prova arguida konfesa faktu hotu no lezadu mós konfirma faktu hotu iha akuzasaun, nune'e prokuradór konsidera arguida provadu komete krime hasoru lezadu. Tanba ne'e husu ba tribunál atu kondena arguida ho pena prizaun tinan rua suspende ba tinan rua.

Enkuantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguida konfesa, arrepende ona nia hahalok no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguida uza katana hodi taa iha lezadu nia ain belar no tata lezadu nia liman rezulta kanek.

Bazeia ba faktu provadu sira ne'e no tetu mós ho sirkunstânsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, nune'e husu ba tribunál atu konklui prosesu ne'e no kondena arguidu ho pena prizaun tinan tolu suspende ba tinan tolu.

7. Krime danu agravadu

Nú. Prosesu : 0031/20.VQLLT

Kompozisaun Tribunál : Koletivu

Juis	: Dr. Evangelino Belo no Dra. Sribuana da Costa, Dra. Maria Modesta d. A. Viera
Prokuradór	: Dr. Julio da Silva Correia
Defeza	: Dr. Grigório Maria Lourdes de Lima
Desizaun	: Pena prizaun tinan 2 suspende ba tinan 2 no selu mós indemnizasaun sivil US\$8.00

Iha 05 Jullu 2023, Tribunál Judisiál Primeira Instânsia Baukau prezide julgamento leitura akordaun ba kazu danu agravadu, ne'ebé envolve arguidu João Soares, hasoru Estadu RDTL, iha Postu Administrativu Lakluta, Munisípiu Viqueke.

Akuzasaun Prokuradór

Prokuradór akuza katak iha 29 Novemburu 2020, iha oras tuku 08:00 dadeer, Sentru Logística Nasional no Ministériu Komérsiu Indústria no Ambiente hala'o programa sesta bázika iha Postu Administrativu Lakluta, Munisípiu Vikeke, hodi distribui sasan sira hanesan mina, fos no sasan sira seluk, ba komunidade sira iha lakluta. Arguidu mós benefisiária husi sesta bázika ne'e. Nune'e iha Ioron refere arguidu mós simu sesta bázika, maibé arguidu haree iha espaduk katak sasan ne'e nia folin la hanesan ho emprezariu sira faan iha loja, nune'e arguidu komesa husu tuir sasan ne'e nia folin ba autoridade sira, maibé sira hatan katak ita boot la iha direitu atu husu kona-ba ida ne'e, karik lakohi simu bele fila ba uma. Arguidu fila uma ba sosa mina rai fila mai fakar ba sesta bazika mak uza eskeru hodi sunu no ahi konsege han tiha mina bimoli litru 5 ho folin US\$8.00, hafoin komunidade sira hamate tiha ahi.

Prokurador akuza arguidu kontra artigu 259 (a) KP kona-ba danu agravadu ho moldura pena tinan 2 to'o tinan 8

Produsaun ba prova sira

Iha produsaun prova arguidu konfesa integralmente ba faktu hotu, arrepende ninia hahalok, arguidu nu'udar agrikultór rezultadu hodi sutenta de'it ba família.

Alegasaun finál

Prokuradór haktuir katak arguidu provadu komete krime danu agravadu bazeia ba arguidu nia konfirmasaun ba akuzasaun no sasan ne'ebé arguidu estraga ne'e utiliza ba públiku. Tanba ne'e husu ba tribunál kondena arguidu ho pena prizaun tinan rua suspende ba tinan rua no kondena arguidu selu indemnizasun sivil ba estadu ho valor US\$8.00.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa no arrepende ona nia hahalok.

Desizaun

Depoisde avalia faktu hotu, tribunál prova katak arguidu ba sosa mina rai fakar ba sesta bazika no uza eskeru hodi sunu no ahi konsege han tiha mina bimoli litru 5 ho folin US\$8.00, hafoin komunidade sira hamate tiha ahi.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu kofesa, arrepende nia hahalok, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua no selu mós indemnizasaun sivil US\$8.00.

8. Krime ofensa ba integridade física simples ho natureza violénsia doméstika

Nú. Prosesu	: 0004/23.BCSIC
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Albino de Jesus Pereira
Desizaun	: Pena multa US\$60.00

Iha 05 Jullu 2023, Tribunál Judisiál Primeira Instânsia Baukau prezide julgamentu leitura sentensa ba kazu ofensa ba integridade fizika simples ho natureza violénsia doméstika ne'ebé envolve arguidu DdCX hasoru nia feen iha Munisípiu Baukau.

Akuzasaun prokuradór

Prokuradór akuza katak iha 26 Janeiru 2023, iha oras tuku 11:00 dadeer, arguidu basa dala ida iha lezada nia kakorok parte loos resulta moras. Antes agresaun ne'e, arguidu ho lezada diskute malu kona-ba lezada inbox nia prima hodi koalia kona-ba eis-namoradu, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende nia hahalok no foins primeiravés mai hatan iha tribunál.

Alende ne'e, lezada konfirma faktu hotu iha akuzasaun no deklara mós katak depoisde akontese sira seidauk di'ak malu to'o agora, arguidu kontaktu lezada, nune'e lezada fila ba arguidu maibé arguidu nia família sempre koalia lezada, nune'e lezada diside fila fali ba nia inan-aman to'o agora la fila ba arguidu.

Alegasaun final

Prokuradór haktuir katak akuzasaun prokuradór prosedente provadu tanba arguidu provadu komete krime hasoru lezada, akontese lezada ba hela nia inan-aman, arguidu kontaktu lezada ne'e mak fila ba arguidu, tuir lolos arguidu ho lezada mak rona malu nu'udar feen la'en, maibé arguidu nia família mak hafahe fali. Tanba ne'e husu ba tribunál atu aplika pena multa ba arguidu.

Enkuantu defeza husu ba tribunál atu kondena arguidu ho pena admoestasaun ho konsiderasaun katak arguidu konfesa, arrepende nia hahalok, diak malu ona ho lezada no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia kakorok parte loos rezulta moras.

Bazeia ba faktu provadu sira ne'e no tetu mós ho sirkunstânsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál, nune'e husu ba tribunál atu kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

9. Krime ofensa ba integridade fizíka simples ho natureza violénsia doméstika(Abilio - Adelina)

Nú. Prosesu	: 0003/23.BCSIC
Kopozisaun Tribunál	: Singulár
Juis	: Dra. Sribuana da Costa
Prokuradór	: Dr. Julio da Silva Correia
Defeza	: Dr. Germano Guterres Ramos
Desizaun	: Pena multa US\$30.00

Iha 06 Julu 2023, Tribunál Judisiál Primeira Instânsia Baukau prezide julgamentu leitura sentensa ba krime ofensa ba integridade fizíka simples ho natreza violénsia doméstika ne'ebé envolve arguidu JdCF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 19 Janeiru 2023, iha oras tuku 09:00 dadeer, arguidu lori kapasete tuda dala ida iha lezada nia reen-toos. Antes agresaun ne'e, arguidu ho lezada diskute malu kona-ba bainhira arguidu sei koalia hela ho nia feton kona-ba sira

nia inan nia moras momentu ne'e lezada bolu arguidu atu fila ona ba uma, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizíka simples ho moldura penal tinan too tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende nia hahalok, di'ak malu ona ho lezada no promete sei la komete tan krime hanesan iha futuru, arguidu serbisu nu'udar agrikultór rezultadu hodi sustenta de'it ba família.

Alende ne'e lezada mós konfirma faktu hotu iha akuzasaun, lezada mós deklara katak di'ak malu ona ho arguidu no moris hamutuk nafatin nu'udar feen ho la'en to'o agora no la baku ona lezada.

Alegasaun finál

Prokuradór konsidera arguidu provadu komete krime hasoru lezada, tanba ne'e husu ba tribunál atu kondena arguidu ho pena prizaun fulan rua suspende ba tinan ida.

Entretantu defeza husu ba tribunál atu kondena arguidu ho pena admoestasaun ho konsiderasaun katak, arguidu konfesa, arrepende ona nia hahalok, foin primeivés mai hatan iha tribunál.

Desizaun

Depoisde avalia faktu sira hotu, tribunál prova katak arguidu hodi kapasete tuda dala ida ba lezada nia reen-toos

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, di'ak malu ona ho lezada no foin primeiravés mai hatan iha tribunál, ho nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

10. Krime ofensa ba integridade fizíka simples ho forma violénsia doméstika

Nú. Prosesu	: 0028/23.BCBCV
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Julio da Silva Correia
Defeza	: Dra. Laura Valenti Lay
Desizaun	: Pena multa US\$45.00

Iha 06 Jullu 2023, Tribunál Judisiál Primeira Instánsia Baukau prezide leitura sentensa ba kazu ofensa ba integridade física simples ho natureza violénsia doméstika ne'ebé envolve arguidu AJXdR hasoru nia feen, iha Munisípiu Baukau.

Akuzasaun prokuradór

Prokuradór akuza katak iha 30 Janeiru 2023, iha oras tuku 09:00 dadeer, arguidu basa dala ida iha lezada nia kanuruk, basa dala ida iha lezada nia hasan parte loos, depois foti nu'u kelen baku dala rua iha lezada nia kelen parte loos, alende baku, arguidu mós insulta lezada ho liafuan ne'ebé la di'ak. Arguidu mós dehan ba lezada katak baku mate lezada mós lezada nia família sei la halo buat ida ba arguidu. Antes agresaun ne'e, arguidu ho lezada diskute malu kona-ba arguidu mendagem nia amante (*selingkuh*).

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende nia hahalok, di'ak malu ona ho lezada no foin primeiravés mai hatan iha tribunál.

Alende ne'e, lezada konfirma faktu hotu iha akuzasaun, depoisde akontese di'ak malu ona, to'o agora arguidu la baku ona leazda.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, ho nune'e husu ba tribunál atu kondena arguidu ba pena prizaun tinan ida suspende ba tinan ida.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa, arrepende nia hahalok no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia kanuruk, basa dala ida iha lezada nia hasan parte loos, depois foti nu'u kelen baku dala rua iha lezada nia kelen parte loos, alende baku, arguidu mós insulta lezada ho liafuan ne'ebé la di'ak. Arguidu mós dehan ba lezada katak baku mate lezada mós lezada nia família sei la halo buat ida ba arguidu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, ho nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

11. Krime ofensa ba integridade física simples ho natureza violénsia doméstika

Nú. Prosesu	: 0001/23.BCVMS
Kompozisaun Tribunál	: Singulár
Juis	: Dr. Evangelino Belo
Prokuradór	: Dr. Ambrósio Rangel Freitas
Defeza	: Dr. Albino de Jesus Pereira
Desizaun	: Pena multa US\$60.00

Iha 07 Jullu 2023, Tribunál Judisiál Primeira Instânsia Baukau prezide leitura sentensa ba kazu ofensa ba integridade física simples ho natureza violénsia doméstika ne'ebé envolve arguidu Angelo CdC hasoru nia eis feen, iha Munisípiu Baukau.

Akuzasaun Prokuradór

Prokuradór akuza katak iha 14 Marsu 2023, iha oras tuku 8:00 dadeer, lezada liu husi arguidu nia uma oin sira-nia oan hakarak tuir lezada nune'e lezada haruka sira nia-oan ba fó hatene ba arguidu no arguidu aseita nune'e lezada tula ho sira-nia oan. Iha oras tuku 18:00 loraik, arguidu telefone tuir lezada atu lori fila sira-nia oan no lezada tula fila duni, maibé bainhira to'o iha arguidu nia uma, sira-nia oan tanis lakohi tun husi motor no hakarak tuir lezada maibé arguidu la aseita no direitamente tuku dala ida iha lezada nia kapasete rezulta lezada nia ulun moras no oin halai. Depoisde ne'e arguidu hadau tiha lezada nia motorizada nia xave maibé lakleur de'it fó fila ba lezada nune'e lezada ho sira-nia oan fila ba lezada nia uma.

Prokuradór akuza arguidu kontra artigu 145 KP kona ofensa ba integridade fizika simples no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha produsaun prova arguidu konfesa integralmente ba faktu hotu, antes ne'e sira rezolve ona perante família arguidu ho lezada moris separa maibé labarik hela ho arguidu, lezada lori labarik la informa ne'e mak arguidu hirus. Arguidu mós deklara katak arrepende nia hahalok, foin primeiravés mai hatan iha tribunál.

Alende ne'e lezada kontinua konfirma faktu hotu iha akuzasaun no deklara katak antes akontesementu ne'e moris separa ona ho arguidu.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós husu ba tribunál atu kondena arguidu ho pena multa.

Enkuantu defeza haktuir katak arguidu konfesa faktu hotu, durante sira moris hamutuk, sira rasik diside moris separa, arrpende nia hahalok, foin primeravés mai hatan iha tribunál. Tanba ne'e husu ba tribunál atu kondena arguidu ho pena admoestasaun.

Desizaun

Depoisde avalia faktu sira hotu, tribunál prova katak arguidu tuku dala ida iha kapasete ne'ebé lezada taka hela iha ulun rezulta lezada nia ulun moras no oin halai.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 90. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

12. Krime ameasa

Nú. Prosesu	: 0121/22.PDBAU
Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dr. Julio da Silva Correia
Defeza	: Dra. Laura Valente Lay
Desizaun	: Pena multa US\$30.00

Iha 10 Jullu 2023, Tribunál Judisiál Primeira Instánsia Baukau prezide leitura sentensa ba kazu ameasa ne'ebé envolve arguidu Eduardu Sebastião Ximenes hasoru Lezadu Saturlino Julião da Silva, iha Aldeia Uaiknasa, Suku Ossuala, Postu Administrativu Vemase, Munisípiu Baukau.

Akuzasaun prokuradór

Prokuradór akuza katak, iha 28 Setembru 2022, iha oras tuku 12:15 meiudia, lezadu aluga kareta hodi tula rai-henek atu fakar iha lezadu nia rai, bainhira kareta lori rai-henek atu fakar iha fatin refere, derepente arguidu halai ba hodi impede netik atu labele fakar iha fatin ne'e, hafoin arguidu ameasa lezadu katak “*kuandu fakar rai-henek ne'e, arguidu sei taa no oho tiha lezadu.*” Momentu ne'e arguidu kaer hela katana ida iha nia liman. Husi arguidu nia hahalok, kareta la konsege fakar rai-henek tanba tauk.

Prokuradór akuza arguidu kontra artigu 157 KP kona-ba ameasa ho nia moldura penál to'o tinan 2 ka multa.

Produsaun ba prova sira

Iha prosesu julgamentu, arguidu deklara katak impede lezadu atu labele fakar rai-henek tanba problema rai seidauk rezolve, arguidu mós deklara katak iha akontesementu ne'e

arguidu kaer katana, tanba atu ba halo bibi luhan no arguidu la ameasa lezadu. Entretantu lezadu konfesa faktu hotu iha akuzasaun.

Testemuña Mario Ximenes Dias nu'udar motorista depoimentu katak, altura ne'ebá nia tula duni rai-henek tanba lezadu mak aluga kareta. Testemuña ne'e akresenta liután katak, momentu kuandu to'o iha fatin ne'e, nia hakiduk kareta arguidu sai husi to'os laran ko'alia ba testamuña katak labele fakar rai-henek lai, maibé tanba testamuña la rona no nia hakiduk nafatin maka arguidu hateten ba testemuña katak "*ita dehan labele fakar ne'e o rona ka lae.*" Testemuña haktuir tan katak so ida ne'e de'it maka arguidu ko'alia ba testemuña, enkuantu kona-ba ameasa atu taa no oho lezadu ne'e testemuña la hatene tanba momentu ne'e nia iha kareta laran.

Alegasaun finál

Prokuradór haktuir katak arguidu provadu komete krime ameasa hasoru lezadu tanba arguidu nia konduta lezadu tauk la fakar rai-henek. Tanba ne'e husu ba tribunál atu fó pena admoestasaun ba arguidu.

Enkuantu defeza haktuir katak arguidu halo duni impedementu ba lezada hodi labele fakar rai-henek iha fatin refere tanba fatin ne'e sei iha problema nia laran. Tanba ne'e husu ba tribunál atu absolve arguidu husi prosesu ne'e.

Desizaun

Depoisde avalia faktu sira hotu, tribunál prova katak arguidu ameasa lezadu katak "*kuandu fakar rai-henek ne'e, arguidu sei taa no oho tiha lezadu.*

Bazeia ba faktu provadu sira ne'e no tetu mós ho sirkunstânsia hotu ne'ebé haleu krime ne'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

13. Krime ofensa ba integridade física simples ho natureza violénsia domestika no ameasa

Nú. Prosesu	: 0007/21.BCBQI
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Germano Ramos
Desizaun	: Pena multa US\$30.00 no omologa dezisténsia keixa

Iha 11 Jullu 2023, Tribunál Judisiál Primeira Instánsia Baukau prezide julgamentu leitura sentensa ba kazu ofensa ba integridade fízika simples ho natureza violénsia doméstika ne'ebé envolve arguidu ALM hasoru nia feen, iha munisípiu Baukau.

Akuzasaun Prokuradór

Prokuradór akuza katak iha 18 Novembru 2021, iha oras tuku 16:30 lokraik, arguidu basa dala haat iha lezada nia ibun, basa dala ida lezada nia matan parte karuk to'o halo lezada monu ba rai no ameasa lezada katak sei oho lezada ho oan sira. Antes agresaun ne'e arguidu ho lezada diskute malu no arguidu ho kondisaun lanu.

Prokuradór akuza arguidu kontra artigu 145 KP kona-ba ofensa ba integridade fízika simple ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD no artigu 157 KP kona-ba ameasa ho moldura penal tinan 2 ka multa.

Antes tama ba produsaun ba prova sira, bazeia ba artigu 262 KPP kona-ba tentativa konsiliaсаun, tribunál halo tentativa konsiliaсаun ba arguidu ho lezada relasiona ho krime ameasa hasoru lezada tanba kazu ne'e klasifika nu'udar krime semi-públiko no nia prosedimentu depende ba keixa.

Iha prosesu konsiliaсаun ne'e, lezada hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime ofensa ba integridade fízika simples ho natureza violénsia doméstika, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak depoisde akontesementu ne'e di'ak malu ona ho lezada, arrepende nia hahalok, foin primeiravés mai hatan iha tribunál no arguidu nu'udar agrikultor rezultadu sustenta de'it ba família. Tanba arguidu konfesa faktu hotu iha akuzasaun tribunál presinde lezada ninia deklarasaun.

Alegasaun finál

Prokuradór haktuir katak arguidu konfirma akuzasaun sein rezerva mezmu sira di'ak malu ona, maibé atu prevene krime ne'e akontese tan iha futuru husu ba tribunál atu kondena arguidu ho pena multa.

Enkuantu defeza haktuir katak bazeia ba produsaun prova, parte defeza husu ba tribunál atu aplika pena ba arguidu bazeia ba arguidu nia kondisaun ekonómia.

Desizaun

Depoisde avalia faktu sira hotu, tribunál prova katak arguidu basa dala haat iha lezada nia ibun, basa dala ida lezada nia matan parte karuk to'o halo lezada monu ba rai.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál no di'ak malu ona ho lezada. Ho nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loran durante loran 60. Tribunál mós fiksa pena alternativa durante loran 40 prizaun, bainhira arguidu la kumpri pena multa refere.

14. Krime ofensa ba integridade física simples ho natureza violénsia doméstika

Nú. Prosesu	: 0010/22.BCPVN
Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dr. Julio da Silva Correia
Defeza	: Dra. Laura Valente Lay
Desizaun	: Pena multa US\$30.00

Iha 11 Jullu 2023, Tribunál Judisiál Primeira Instánsia Baukau prezide leitura sentensa ba kazu ofensa ba integridade física simples ho natureza violénsia doméstica, ne'ebé envolve arguidu MdS hasoru nia feen, iha Munisípiu Baukau.

Akuzasaun prokuradór

Prokuradór akuza katak Iha 14 Dezembru 2022, iha oras tuku 21:35 kalan, arguidu basa dala ida iha lezada nia hasan parte loos, tebe dala ida iha lezada nia kelen parte loos, tebe dala ida iha lezada nia kidan no tebe dala ida iha lezada nia kakorok. Antes agesaun ne'e, arguidu ho lezada diskute malu kona-ba sira nia bibi tama viziňu nia kintal.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé akuza ba arguidu ne'e loos hotu, depoisde akontese liu kalan ida de'it sira di'ak malu kendas, arrepende ninia

hahalok, foin primeiravés mai hatan iha tribunál, serbisu nu'dar agrikultor rezultadu hodi sustenta de'it ba família.

Entretantu lezada konfirma faktu hotu iha akuzasaun no deklara katak depoisde akontesementu ne'e di'ak malu ona no to'o agora la baku ona lezada, lezada mós lakohi arguidu atu tama prizaun.

Alegasaun finál

Prokuradór haktuir katak akuzasaun prokuradór prosedente provadu hotu no bazeia mós ba produsaun prova katak arguidu halo agresaun hasoru lezada nu'udar nia feen tuir lolos arguidu mak proteze maibé pelo kontrariu. Tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Alende ne'e defeza haktuir katak iha produsaun ba prova arguidu konfesa faktu sein rezerva, di'ak malu ona, arrepende nia hahalok no foin primeiravés mai hatan iha tribunál. kona-ba pena parte defeza konkorda ho prokuradór ninia alegasaun.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan parte loos, tebe dala ida iha lezada nia kelen parte loos, tebe dala ida iha lezada nia kidan no tebe dala ida iha lezada nia kakorok.

Bazeia ba faktu provadu sira ne'e no tetu mós ho sirkunstânsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál no di'ak malu ona ho lezada. Ho nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

15. Krime ofensa ba integridade física simples ho natureza violénsia doméstika

Nú. Prosesu	: 0011/22.BCLGA
Kompozisaun Tribunál	: Singulár
Juis	: Dr. Evangelino Belo
Prokuradór	: Dra. Remizia de Fatima
Defeza	: Dr. Grigório Maria Lourdes de Lima
Desizaun	: Pena multa US\$72.00

Iha 11 Jullu 2023, Tribunál Judisiál Primeira Instânsia Baukau prezide leitura sentensa ba kazu ofensa ba integridade física simples ho natureza violénsia doméstika ne'ebé envolve arguidu NAP hasoru nia feen, iha Munisípiu Baukau.

Akuzasaun prokuradór

Prokurador akuza katak iha 09 Desemburu 2022, iha oras tuku 20:00 kalan, arguidu ameasa lezada dehan "atu baku mate lezada," ho nune'e lezada halai ba subar tiha iha du'ut laran besik uma kotuk, arguidu duni tuir lezada maibé lezada subar no arguidu la

hetan. Tuir mai iha 10 Desembru 2022, iha oras tuku 20:00 kalan, arguidu kontinua buka lezada, bainhira lezada haree hetan arguidu, tanba tauk ho arguidu lezada halai rezulta lezada monu no lezada nia liman parte karuk kanek no ain mós kanek.

Prokuradór akuza arguidu kontra artigu 145 KP kona-ba ofensa ba intrigidade física simples no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak iha akontesementu ne'e arguidu fila husi to'os no dehan ba lezada atu fase hela arguidu nia roupa, maibé lezada lakohi fase ne'e mak arguidu hirus duni lezada no mesak monu liman parte karuk hetan kanek no aintuur hetan kanek. Depoisde akontese sira di'ak malu ona, arrepende nia hahalok durante forma família desde 2013, foin primeiravés hirus lezada no serbisu nu'udar agrikultor rezultadu hodi sustenta de'it ba família.

Alende ne'e, lezada konfirma faktu no montivasaun iha akuzasaun, akontese ne'e lezada halai subar iha du'ut laran no toba kalan ida iha de'it du'ut laran, lezada mós deklara arguidu duni lezada mak monu hetan kanek liman parte karuk no ain rua kanek hotu. Depoisde akontese sira di'ak malu to'o agora arguidu la halo ona agresaun hasoru lezada.

Alegasaun finál

Prokuradór haktuir katak akuzasaun prokuradór prosedente provadu katak arguidu komete krime ofensa ba integridade física simples hasoru lezada, mezmu di'ak malu ona maibé nafatin husu ba tribunál atu kondena arguidu tuir artigu 145 KP, nune'e evita arguidu komete tan krime hanesan iha futuru.

Enkuantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu confesa, arrepende nia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu sira hotu, tribunál konsidera faktu hotu provadu, bazeia ba faktu provadu sira ne'e no tetu mós sirkunstânsia atenuante sira hanesan arguidu confesa, arrepende nia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$72.00 ne'ebé arguidu sei selu 0,80 sentavus kada loran durante loran 90. Tribunál mós fiksa pena alternativa ba arguidu durante loran 90 prizaun, bainhira arguidu la kumpri pena multa refere.

16. Krime ofensa ba integridade física simples ho natureza violénsia doméstika

Nú. Prosesu	: 0040/22.MNMNT
Kopozisaun Tribunál	: Singulár
Juis	: Dra. Sribuana da Costa

Prokuradór	: Dr. Ambrosio Rangel Freitas
Defeza	: Dr. Germano Guterres Ramos
Desizaun	: Pena multa US\$100.00

Iha 12 Jullu 2023, Tribunál Judisiál primeira Instânsia Baukau prezide julgamento leitura sentensa ba krime ofensa ba integridade fizika simples, ne'ebe envolve arguidu AZdCS, hasoru nia feen segundu, iha Munisípiu Manatuto.

Akuzasaun Prokuradór

Prokuradór akuza katak iha 08 Setembru 2022, iha oras tuku 21:30 kalan, arguidu buti maka'as iha lezada nia kakorok no tebe dala ida ho maka'as iha lezada nia hirus matan. Antes agresaun ne'e, arguidu ho lezada diskute malu kona-ba arguidu telefone lezada atu sira la'o deit ba iha uma andar iha besik natar ninin, maibé lezada lakohi nune'e sira ba deit ho motor, bainhira to'o iha neba lezada haree arguidu nia telemovel lezada nia nomor kontaktu arguidu tau fali mane ida naran ne'e mak lezada husu ba arguidu "*tanba sa mak tau fali mane nia naran?*," arguidu hatan la iha problema, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho natureza violénsia doméstika ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamento arguidu deklara katak iha akontesementu ne'e lezada mak tolok arguidu, basa no rasta arguidu nia faru nakles hotu no kaer ho ai-dona ida atu baku arguidu ne'e mak arguidu hirus hodi dada lezada nia liman, buti lezada nia kakorok, tebe ho maka'as dala ida iha lezada nia hirus matan.

Alende ne'e lezada kontinua konfirma faktu hotu iha akuzasaun no lezada deklara katak, lezada, lees arguidu nia faru, tanba arguidu tebe lezada monu ba rai. Lezada deklara liután katak depoisde akontesimentu ne'e liu tiha semana ida sira diak malu fali no sira forma família iha tinan 2021.

Alegasaun final

Prokuradór haktuir katak arguidu provadu komete krime ofensa ba integridade fizika simples ho natureza violénsia doméstika, hasoru lezada, arguidu nu'udar membru PNTL tuiroloos komprende regra sira ne'e, atu prevene arguidu nia konduta iha futuru husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak arguidu deklara faktu ne'ebé nia komete, di'ak malu ona ho lezada, Tanba ne'e husu ba tribunál atu kondena arguidu ho pena admoestasaun, maibé karik tribunál iha hanoin seluk bele aplika pena multa ba arguidu.

Desizaun

Depoisde avalia faktu sira hotu, tribunál prova katak arguidu buti maka'as iha lezada nia kakorok no tebe dala ida ho maka'as iha lezada nia hirus matan.

Bazeia ba faktu provadu sira ne'e no tetu mós sirkunstánsia atenuante sira hanesan arguidu deklara faktu hotu iha akuzasaun no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$100.00 ne'ebé arguidu sei selu US\$1.00 kada loron durante loron 100. Tribunál mós fiksa pena alternativa loron 70 prizaun, bainhira arguidu la kumpri pena multa refere.

17. Krime ofensa ba integridade física simples ho natureza violénsia doméstika

Nú. Prosesu	: 0026/22.VQVQQ
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrosio Rangel Freitas
Defeza	: Dra. Germano Guterres Ramos
Desizaun	: Pena multa US\$60.00

Iha 12 Jullu 2023, Tribunál Judisiál Primeira Instânsia Baukau prezide julgamentu leitura sentensa ba kazu ofensa ba integridade física simples ho natureza violénsia doméstika ne'ebé envolve arguidu MSH hasoru nia feen, iha Munisípiu Vikeke.

Akuzasaun prokuradór

Prokurador akuza katak iha 11 Juñu 2022, iha oras tuku 06:00 lokraik, arguidu tebe dala ida iha lezada nia kotuk laran, lezada atu halai arguidu kaer lezada nia lipa no dudu lezada husi kotuk rezulta lezada fai lezada nia reen-toos ba paredi no lezada ba tuur fali iha dapur laran arguidu tuir lezada ba hodi tuku tan dala ida iha lezada nia tilun no lori ai-baku dala rua iha lezada nia kaba'as parte karuk. Antes agresaun ne'e, arguidu ho lezada diskute malu kona-ba lezada fila uma tarde. Ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha produsaun ba prova arguidu konfesa integralmente ba faktu hotu iha akuzasaun, arguidu mós deklara katak depoisde akontesementu ne'e sira diak malu fali ona, dezde forma família iha tinan 1994, foim primeiravés baku lezada no mai hatan iha tribunál, arrepende ninia hahalok inklui husu ona deskulpa ba lezada no arguidu serbisu nu'udar agrikultor rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no deklara katak hanesan feen nia sei hadomi arguidu tanba sira moris hamutuk tinan barak ona no foin primeiravés halo agresaun hasoru lezada no to'o agora la baku ona lezada.

Alegasaun finál

Prokuradór haktur katak iha produsaun ba prova arguidu konfesa faktu hotu iha akuzasaun no konfirma mós husi lezada, nune'e prokuradór konsidera arguidu provadu halo agresaun hasoru lezada no atu prevene arguidu repete ninia hahalok ne'e iha futuru husu ba tribunál atu kondena arguidu ho pena multa.

Enkuantu defeza haktur katak arguidu konfesa integralmente ba krime ne'ebé inputa ba arguidu, di'ak malu ona, arrepende nia hahalok, foin primeiravés mai hatan iha tribunál. Tanba ne'e husu ba tribunál fó pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu tebe dala ida iha lezada nia kotuk laran, lezada atu halai arguidu kaer lezada nia lipa no dudu lezada husi kotuk rezulta lezada fai lezada nia reen-toos ba paredi no lezada ba tuur fali iha dapur laran arguidu tuir lezada ba hodi tuku tan dala ida iha lezada nia tilun no lori ai-baku dala rua iha lezada nia kaba'as parte karuk.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende nia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

18. Krime ofensa ba integridade fizika simples

Nú. Prosesu	: 0066/21.VQVQQ
Kompozisaun tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Germano Guterres Ramos
Desizaun	: Pena multa US\$60.00

Iha 18 Jullu 2023, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fizika simples ne'ebé envolve arguidu Paulo Ximões hasoru lezada Domingas Jacinta (viziňu), iha Suku Karaubalu, Postu Administrativa Vikeke Vila, Munisípiu Vikeke.

Akuzasaun Prokuradór

Prokuradór akuza katak iha 13 Dezembru 2021, iha oras tuku 18:00 lokraik, lezada rona barullu iha sira nia uma oin, nune'e lezada halai sai husi uma laran hodi haree, iha ne'ebá lezada haree arguidu iha hela lezada nia uma oin, arguidu hahú ko'alia hasoru lezada dehan "O mak sobu ha'u nia uma laran", lezada la simu no hatan fali ba arguidu dehan "ha'u sobu ó nia uma laran oinsa? komesa mosu diskusaun entre lezada ho arguidu. Arguidu nervozu foti katana atu taa lezada maibé la konsege, nune'e arguidu tuku dala rua iha lezada nia hirus matan no tebe dala ida lezada nia kaba'as.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu. Motivu lezada sempre tolok arguidu no koalia aat arguidu kona-ba arguidu hola tan foto seluk. Depoisde akontese arguidu buka atu di'ak malu ho lezada maibé lezada mak lakohi, arguidu arrepende nia hahalok no foin primeiravés mai hatan iha tribunál.

Alende ne'e, lezada deklara katak lezada latihene problema saida maka akontese iha arguidu nia uma laran, derepente de'it arguidu sai mai diskute ho lezada, arguidu nervozu tuku lezada nia hirus matan dala rua no tuku dala ida iha lezada nia kaba'as.

Alegasaun finál

Prokuradór haktuir katak, indisius suficiente no arguidu mós konfesa integralmente ba faktus sira ne'ebé imputa ba nia, hahalok ne'ebé arguidu práktika ne'e krime ofensa ba integridade fizika simples ho natureza violénsia doméstika. Tanba ne'e solisita ba tribunál atu aplika pena multa ba arguidu.

Enkuantu husi parte defeza husu ba tribunál atu haree ba arguidu nia deklarasaun no kondisaun hotu hanesan konfesa faktu, arrepende nia hahalok, di'ak malu ona ho lezada no foin primeiravés mai hatan iha tribunál. Tanba ne'e husu ba tribunál atu aplika pena multa ba arguidu.

Desizaun

Depoisde avalia faktu sira hotu, tribunál prova katak arguidu tuku dala rua iha lezada nia hirus matan no tebe dala ida iha lezada nia kabás.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, arrepende ninia hahalok nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

19. Krime ofensa ba integridade fizika simples ho natureza violénsia doméstika

Nú. Prosesu : 0118/22.BCBCV

Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dr. Ambrósio Rangel Freitas
Defeza	: Dr . Germano Guterres Ramos
Desizaun	: Pena multa US\$15.00

Iha 18 Jullu 2023, Tribunál Judisiál Primeira Instánsia Baukau prezide julgamentu leitura sentensa ba kazu ofensa ba integridade fizika simples ho natureza violénsia doméstika ne'ebé envolve arguidu SJC hasoru nia feen iha, Munisípiu Baukau.

Akuzasaun prokuradór

Prokuradór akuza katak iha 18 Agostu 2022, iha oras tuku 18:30 lokraik arguidu uza katana nia belar baku dala ida iha lezada nia kaba'as parte karuk no tebe dala ida lezada nia hasan parte karuk. Antes agresaun ne'e, arguidu ho lezada diskute malu kona-ba arguidu ho kondisaun lanu husu motor nia xave maibé sira nia oan lori tiha, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penal too tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak iha akuzasaun ne'e loos hotu. Tanba tuir arguidu katak, altura ne'ebá nia kondisaun lanu no arguidu mós deklara katak nia baku duni lezada uza katana nia belar, antes ne'e arguidu nunka baku lezada, dadaun ne'e sira di'ak malu ona, arrepende ba ninia hahalok no foin primeiravés mai hatan iha tribunál.

Alende ne'e, lezada konfirma katak, momentu ne'ebá arguidu baku duni lezada uza katana nia belar iha lezada nia kaba'as parte karuk dala ida no tebe lezada nia hasan parte karuk dala ida, hafoin lezada ba konsulta iha ospital loron ida de'it no simu aimoruk, antes arguidu nunka baku lezada no to'o agora sira di'ak malu ona.

Alegasaun finál

Prokuradór haktuir katak arguidu práctica krime ofensa ba integridade física simples ho natureza viloénsia doméstika, arguidu confesa nia hahalok no foin mak primeiravés halo agresaun hasoru lezada. Tanba ne'e husu ba tribunál fo aplika pena admoestasaun ba arguidu.

Alende parte defeza aseita prokuradór nia alegasaun no husu ba tribunál atu fó pena admoestasaun ba arguidu.

Desizaun

Depoisde avalia faktu sira hotu, tribunál prova katak arguidu uza katana nia belar baku dala ida iha lezada nia kaba'as parte karuk no tebe dala ida lezada nia hasan parte karuk

Bazeia ba faktu provadu sira ne'e no tetu mós sirkunstânsia atenuante sira hanesan arguidub foin primeiravés mai hatan iha tribunál, di'ak malu ona, arrepende ninia hahalok nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu 0,50 sentavus kada loran durante loran 30. Tribunál mós fiksa pena alternativa durante loran 20 prizaun, bainhira arguidu la kumpri pena multa refere.

20. Krime ofensa ba integridade fizíka simples ho natureza violénsia doméstika

Nú. Prosesu	: 0022/22. LALPL
Kopozisaun Tribunál	: Singulár
Juíz	: Dr. Jose Antonio d. Escurial
Prokuradór	: Dra. Remizia de Fatima
Defeza	: Dr. Grigório Maria Lourdes de Lima
Desizaun	: Pena multa US\$30.00

Iha 20 Jullu 2023, Tribunál Judisiál premeira Instânsia Baukau prezide julgamento leitura sentensa ba krime ofensa ba integridade fizíka simples no natureza violénsia doméstika, ne'ebé envolve arguidu AS hasoru nia feen iha Munisípiu Lautein.

Akuzasaun Prokuradór

Prokurador akuza katak iha 12 Julu 2022, iha oras tuku 20:00 kalan, arguidu basa dala rua iha lezada nia hasan, tuku dala ida iha lezada nia inus hetan kanek no raan. Antes agresaun ne'e, arguidu ho lezada diskute malu kona-ba lezada hetan arguidu iha arguidu nia amante (*selingkuh*) nia uma, ho nune'e mosu agresaun nian.

Prokuradór akuza arguidu kontra artigu 145 KP kona-ba ofensa ba integridade fizíka simples ho moldura penal tinan 3 ka multa konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamento arguidu deklara katak lezada hetan arguidu iha nia amante nia uma, mosu diskusaun arguidu hisik liman kona lezada nia ibun no basa dala rua iha lezada nia hasan. Arguidu fila husi sela detensaun polísia di'ak malu kedas ho lezada, arrepende ona nia hahalok tanba forma família iha tinan 2008, iha oan nain tolu foin primiravés baku lezada, promete sei la amante (*selingkuh*) tan ho feto seluk no arguidu serbisu nu'udar motorista kada fulan hetan vensimentu US\$200.00.

Alende ne'e kezada kontinua konfirma faktu hotu iha akuzasaun deklara katak buka arguidu mak hetan iha nia amante (*selingkuh*) nia uma ho nune'e arguidu ho lezada diskute malu no mosu agresaun ne'e.

Alegasaun finál

Prokuradór haktur katak arguidu halo duni agresaun hasoru lezada nu'udar nia feen, akuzasaun prokuradór prosedente provadu atu prevene arguidu nia hahalok iha futuru. parte prokuradór entrega ba tribunál atu diside tuir arguidu nia hahalok.

Etrentantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa, arrepende nia hahalok no foin primeravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu basa dala rua iha lezada nia hasan, tuku dala ida iha inus hetan kanek no raan.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, arrepende ninia hahalok nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa ba arguidu durante loron 20 prizaun, bainhira arguidu la kumpri pena multa refere.

21. Krime ofensa ba integridade física simples ho natureza violénsia doméstika

Nu. prosesu	: 0003/22. MNLLA
Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dra. Remizia de Fatima
Defeza	: Dr. Germano Guterres Ramos
Desizaun	: Pena multa US\$30.00

Iha 20 Jullu 2023, Tribunál Judisiál Primeira Instânsia Baukau prezide julgamentu leitura sentensa ba kazu ofensa ba integridade física simples ho natureza violénsia doméstika ne'ebé envolve arguidu AVdC hasoru nia feen, iha Munisípiu Manatuto.

Akuzasaun prokuradór

Prokuradór akuza katak iha 16 Maiu 2022 iha oras tuku 21:00 kalan arguidu tuku dala tolu iha lezada nia kaba'as, tuku dala ida iha lezada nia matan fukun parte loos no rasta lezada. Antes agresaun ne'e arguidu ho lezada diskute malu kona-ba lezada rona arguidu amante (*selingkuh*), ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak konfesa faktu hotu iha akuzasaun no deklara katak depoisde akontesementu ne'e di'ak malu ona ho lezada, forma família iha

tinan 2007, foin primeiravés komete krime hasoru lezada, arguidu nu'udar negosianté kada fulan rendementu bele to'o US\$100.00/liu.

Alende ne'e lezada kontinua konfirma faktu hotu iha akuzasaun no di'ak malu ona perante família to'o agora la baku ona lezada.

Alegasaun finál

Prokuradór haktuir katak iha produsaun prova arguidu konfesa totalmente ba faktu ne'ebé imputa ba nia no lezada mós konfirma faktu hotu iha akuzasaun atu prevene arguidu nia hahalok hodi labele halo tan agresaun hasoru lezada iha futuru no haree ba arguidu nia kondisaun ekonomika husu ba tribunál aplika pena multa ba arguidu.

Alende ne'e defeza konkorda prokuradór nia alegasaun bazeia ba arguidu nia deklarasaun iha produsaun ba prova.

Desizaun

Depoisde avalia faktu sira hotu, tribunál prova katak arguidu tuku dala tolu iha lezada nia kaba'as rasta lezada no tuku dala ida iha lezada nia matan fukun parte loos.

Bazeia ba faktu provadu sira ne'e no tetu mós sirkunstânsia atenuante sira hanesan arguidu konfesa, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

22. Krime abuzu seksuál ba menór

Nú. Prosesu	: 0008/22.BCSIC
Konpozisaun Tribunál	: Koletivu
Juis	: Dra. Sribuana da Costa, Dr. Yudi Pamukas no Dra. Maria Modesta d. A. Viera
Prokuradór	: Dra. Remizia de Fatima
Defeza	: Dr. Cristovão Nunu Ximenes (advogadu privadu)
Desizaun	: Pena prizaun tinan 5

Iha 24 Jullu 2023, Tribunál Judisiál Primeira Instânsia Baukau prezide julgamentu leitura akordaun ba krime abuzu seksuál ba menór ne'ebé envolve arguidu FFS hasoru menor ho idade tinan 13, Iha Munisípiu Baukau.

Akuzasaun prokuradór

Prokuradór akuza katak iha 13 Janeiru 2022, iha oras tuku 17:00 lokraik, arguidu tula lezada ho mikrolet hamutuk ho testemuña sira no arguidu mak konduz mikrolete, bainhira to'o iha fatin refere, arguidu fó fali kareta ba testemuña mak konduz, arguidu ba tuur hamutuk fali ho lezada iha kotuk, haku'ak lezada, hatama liman ba lezada nia kalsa kokir lezada nia orgaun sensitivu. Lezada sente moras, lezada baku arguidu nia liman, arguidu husik no sira kontinua ba fatin destinadu. Bainhira to'o iha ne'ebá, arguidu lori lezada ba iha du'ut laran hodi halo relasaun seksuál ho lezada. Depoisde akontesementu ne'e iha 13 Jullu 2023, mak lezada ba halo keixa iha komando PNTL, Munisípiu Baukau, seksaun VPU.

Prokuradór akuza arguidu kontra artigu 177 KP kona-ba krime abuzu seksuál ba menór ho moldura penal tinan 5 too tinan 20.

Produsaun ba prova sira

Iha prosesu julgamentu, arguidu deklara katak faktu balun loos no balun laloos. Arguidu hatama liman ba lezada nia kalsa kokir lezada nia orgaun sensitivu no kaer lezada nia orgaun sensitive maibé lalais deit no arguidu mós deklara katak halo duni relasaun seksuál ho lezada tanba iha relasaun namoru no relasaun ne'e akontese tanba hakarak ho hakarak no relasaun seksuál ne'e laos foin akontese, maibé antes ne'e akontese ona no ida ikus ne'e bad ala haat ona.

Alende ne'e, lezada konfirma faktu hotu iha akuzasaun no deklara katak nia ho arguidu namora duni, maibé antes ne'e seidauk halo relasaun seksuál, maibé foin mak primeiravés akontese. Lezada deklara katak nia la hakarak halo relasaun seksuál ho arguidu tanba namora ne'e atu halo kolega de'it la'os atu halo relasaun seksuál no la'os atu hola malu. Maibé iha momentu akontese ne'e lezada labele halo reasaun hasoru arguidu, tan lezada sente trauma, ta'uk buat seluk akontese tan ba lezada, lezada tuir de'it arguidu nia hakarak. Arguidu la halo ameasa hasoru lezada.

Testemuña hato'o nia depoimentu katak arguidu hadi'a hela kareta, lezada ba tan sira, direta ba tuur iha kareta laran. Lakleur arguidu tama ba kareta laran ko'alia ho lezada, la hatene ko'alia saida, derepende arguidu sai mai dehan loos ona ita lori nia ba, maibé lahatene atu ba ne'ebé. Arguidu mak lori kareta, Romaldo ho sasin Basílio tuur iha kareta kotuk, lezada tuur besik kondutor nia kadeira kotuk kedes. Bainhira to'o iha fatin refere arguidu haruka sasin lori fali kareta. Arguidu fila fali ba tuur ho lezada iha kotuk. Durante tuir dalan testemuña deklara katak nia la haree saida mak akontese entre

arguidu ho lezada iha kareta kotuk, maibé nia haree no foku ba dalan, to'o iha fatin akontesementu, arguidu haruka testemuña para kareta, arguidu ho lezada ba iha duut laran, la hatene sira na'in rua halo saida. Testemuña mós deklara katak nia tuur de'it iha kareta laran ho testemuña seluk.

Testemuña BBF hato'o nia depoimentu katak testemuña sira ho arguidu hadia hela kareta. Lezada ba to'o iha fatin ko'alia ho arguidu, hafoin arguidu dehan atu tula lezada ba nia uma. To'o iha fatin akontesementu arguidu haruka fali testemuña lori kareta, arguidu ba tan fali lezada iha kotuk no testemuña tuur fali iha kareta oin, hamutuk ho testemuña seluk. To'o iha fatin refere arguidu haruka para kareta, arguidu ho lezada direta ba du'ut laran no lahatene saida mak akontese antre arguidu ho lezada.

Alegasaun finál

Prokuradór konsidera arguidu provadu komete krime hasoru lezada no prova duni katak arguidu halo relasaun seksuál hasoru lezada, halo lezada trauma to'o la konsege halo reasaun hasoru arguidu. Lezada namora la'os atu halo relasaun seksuál, tan lezada foin eskola to'o iha pre-secundária, idade sei ki'ik, halo relasaun seksuál la ho konsentimentu, arguidu la kuidadu lezada maibé estraga fali lezada. Prokuradór haree katak namora ne'e hanesan sirkunstansia atenuante de'it, maibé halo relasaun seksuál hasoru manór ne'e krime. Nune'e prokuradór husu ba tribunál atu aplika pena justu ba arguidu.

Entretantu defeza hafoin produsaun prova haree katak arguidu halo relasaun seksuál ho lezada tan sira iha relasaun namoru, nune'e husu ba tribunál atu aplika pena kmaan ba arguidu.

Desizaun

Depoisde avalia faktu sira hotu, tribunál konsidera faktu hotu provadu, bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, arrepende ninia hahalok nune'e tribunál konkui prosesu ne'e no kondena arguidu ho pena przaun tinan lima.

23. Krime ofensa ba integridade fízika

Nú. Prosesu	: 0052/21.LALPL
Kompozisaun Tribunál	: Singulár
Juis	: Dra. Sribuana da Costa

Prokuradór	: Dr. Julio da Silva Correia
Defeza	: Dr. Grigório Maria Lourdes de Lima
Desizaun	: Pena multa US\$60.00

Iha 24 Jullu 2023, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fízika simples ne'ebé envolve arguidu Gaudêncio José Garcia (editoral) no Armindo Garcia hasoru lezadu Nikson Garcia iha bairro PLN, Aldeia Bemoris, Suku Fuiuru, Postu Administrativu Lospalos, Munisípiu lautéin.

Akuzasaun prokuradór

Prokuradór akuza katak iha 26 Dezembru 2021, oras tuku 08:00 dadeer, iha area bairro PLN, Aldeia Bemoris, Suku Fuiuru, Postu Administrativu Lospalos, Munisípiu Lautéin. Iha tempu ne'ebá lezadu Wilson Garcia, hetan ataka husi arguidu Gaudêncio José Garcia ho maneira tuku iha inus no ibun halo kanek no raan sai barak. Arguidu ba bolu tan nia aman arguidu Armindo Garcia sira mai ataka lisuk lezadu. Arguidu Armindo lori liman ta'a iha ulun parta karuk, halo lezadu lakon sentidu iha minutu balun nia laran mak lezadu nia tian Rosalina Pereira ho nia kabén Filipe Pereira mak lori lezadu ba sentru saúde hodi halo tratamentu, hafoin fila kedes ba uma.

Prokuradór akuza arguidu Gaudêncio José Garcia no Armindo kontra artigu 145 KP, kona-ba krime ofensa ba integridade fízika simples ho moldura penal to'o tinan 3 ka multa.

Produsaun ba prova sira

Iha prosesu julgamentu arguidu Armindo Garcia deklara katak faktu sira loos hotu. Arguidu Armindo iha hela nia uma, nia oan arguidu Gaudêncio mak ba bolu nia iha uma, sira na'in rua ba to'o iha lezadu nia fatin, arguidu Armindo hahú diskute malu ho Lezadu, arguidu Armindo nervozu direta taa lezadu ho liman belar lezadu desmaia monu kedes ba rai. Arguidu Armindu baku lezadu motivu tanba antes ne'e lezadu lori kareta tenta atu soke nia oan Gaudêncio dala tolu ona. Arguidu Armindu hakarak dame ho lezadu, maibé lezadu maka lakah. Arguidu arrepende ba nia hahalok no foin primeiravés mai hatan iha tribunál.

Alende ne'e lezadu deklara katak, lezadu mak baku uluk arguidu Gaudêncio, motivu tanba arguidu Gaudêncio ba insulta no tolok lezadu, nune'e lazadu nervozu baku

arguidu Gaudêncio hafoin sira na'in rua baku malu. Arguidu tuku kona Lezadu nia inus no ibun halo raan sai no kanek, lakteur arguidu Gaudêncio ba bolu tan nia aman Arguidu Armindo mai baku lezadu to'o desmaia. Lezadu deklara hafoin sira monu ba rai, kuaze oras haat nia laran mak nia foin konsiente, ba halo tratamentu, hotu fila kellas ba uma. Lezadu sente moras kuaze durante loron haat, no semana ida mak foin di'ak. Lezadu hein arguidu sira atu resolve maibé arguidu sira mak la ba lezadu nia uma hodi rezolve.

Alegasaun finál

Iha alegasaun prokuradór alega katak arguidu Armindo konfesa faktu sira ne'ebé inputa ba nia, enkuantu arguidu Gaudêncio editál. Faktu sira ne'e prova duni katak arguidu sira baku duni lezadu, primeiru arguidu gaudêncio maka baku uluk, hafoin ba bolu nia aman arguidu Armindo ba baku tan lezadu. Aktu arguidu na'in rua nian ne'e pratika duni krime ofensa ba integridade fízika simples hasoru lezadu. Nune'e prokuradór husu ba tribunál atu aplika pena multa ba kada arguidu.

Enkuantu husi parte defeza alega katak arguidu konfesa integralmente, arguidu Armindo baku lezadu, tanba antes ne'e lezadu lori kareta tenta hela de'it kuaze ba dala tolu ona atu soke nia oan arguidu Gaudêncio. Defeza haree mós katak hirak ne'e hotu akontese tan la iha aman ida mak husik nia oan atu ema seluk baku, nune'e arguidu Armindo laran moras ho nervozu mak baku hodi hanorin lezadu. Arrepende ba ninia hahalok no foin primeiravés mai hatan iha tribunál. Tanba ne'e husu ba tribunál atu aplika pena adekuadu ba arguidu.

Desizaun

Depoisde avalia faktu sira hotu, tribunál prova katak arguidu iha tempu ne'ebá lezadu Wilson Garcia, hetan ataka husi arguidu Gaudêncio José Garcia ho maneira tuku iha inus no ibun halo kanek no raan sai barak. Arguidu ba bolu tan nia aman arguidu Armindo Garcia sira mai ataka lisuk lezadu. Arguidu Armindo lori liman taa parte karuk, halo lezadu laken sentidu iha minutu balun nia laran.

Bazeia ba faktu provadu sira ne'e no tetu mós sirkunstânsia atenuante sira hanesan foin primeiravés mai hatan iha tribunál, di'ak malu ona, arrepende sira nia hahalok nune'e tribunál konklui prosesu ne'e no kondena kada arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa ba arguidu durante loron 40 prizaun, bainhira arguidu la kumpri pena multa refere.

24. Krime ofensa ba integridade fizika simples ho natureza violénsia doméstika

Nú. Prosesu	: 0003/23.MNMNT
Kompozisaun Tribunál	: Singulár
Juis	: Dr. Yudi Pamunkas
Prokuradór	: Dr. Ambrósio Rangel Freitas
Defeza	: Dr. Grigório Maria Lourdes de Lima
Desizaun	: Pena prizaun fulan 6 suspende batinan 1

Iha 24 Jullu 2023, Tribunál Judisiál Primeira Instânsia Baukau prezide julgamento leitura sentensa ba kazu ofensa ba integridade fizika simples ho natureza violénsia doméstika ne'ebé envolve arguidu JMT hasoru nia feen, iha Munisípiu Manatuto.

Akuzasaun prokuradór

Prokuradór akuza katak iha 01 Janeiru 2023, iha oras tuku 06:00 lokraik, arguidu tuur hemu hela tua no lezada atu ba kuru bé iha mota, momentu ne'e, lezada dehan ba arguidu katak, *labarik na'in rua toba hela, hare labarik sira ne'e*, hafoin lezada mós la'o ba dadaun, bainhira lezada fila husi kuru bé no hit hela ho bé masa ha'at iha dalan, arguidu mós halai lori ho ai-serejas sanak ida hasoru lezada no la-koalia buat ruma imediata baku dala rua iha lezada nia liman parte loos no baku dala rua iha lezada nia kidan.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penal too tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamento arguidu deklara katak iha akuzasaun ne'e loos hotu, altura arguidu kondisaun lanu no baku duni lezada uza ai-serejas maibé antes arguidu nunka baku lezada, sira di'ak malu ona, arrepende ninia hahalok no foins primeiravés mai hatan iha tribunál.

Alende ne'e, lezada konfirma akuzasaun no deklara tan katak problema akontese iha 01 Jeneiru 2023 sira diak malu fali 04 Jeneiru 2023 ho kondisaun arguidu husu deskulpa ba lezada.

Alegasaun finál

Prokuradór akuza katak arguidu prática krime ofensa ba integridade fizika simples ho forma violénsia doméstika, katak faktu provadu, arguidu konfesa integralmente, atu prevene arguidu nia konduta iha futuru, husu ba tribunál atu aplika pena multa ba arguidu US\$60 kada loran selu US\$1.00.

Entertantu hakituir katak arguidu konfesa integralmente sein reserva, faktu sira iha akuzasaun, parte defeza husu ba tribunál haree ba arguidu nia kondisaun, hanesan oan na'i rua no dadaun sira di'ak malu ona. Tanba ne'e husu ba tribunál atu aplika pena adekuadu ba arguidu.

Desizaun

Depoisde avalia faktu sira hotu, tribunál prova katak arguidu halai lori ho ai-serejas sanak ida hasoru lezada no la-koalia buat ida ba lezada, imediata baku kedes dala rua ho ai-serejas ba lezada nia liman loos no baku-tan dala rua kona iha lezada nia kidan,

Bazeia ba faktu provadu sira ne'e no tetu mós sirkunstânsia atenuante sira hanesan foins primeiravés mai hatan iha tribunál, di'ak malu ona, arrepende ninia hahalok nune'e tribunál konkui prosesu ne'e no kondena arguidu ho pena prizaun fulan neen suspende ba tinan ida

25. Krime omisídiu negligente

Nú. Prosesu	: 0015/23.BCSTR
Kompozisaun Tribunál	: Singulár
Juis	: Dr. Jose Antonio d. Escurial,
Prokuradór	: Dr. Julio da Silva Correia
Defeza	: Dr. Albino de Jesus Pereira
Desizaun	: Pena prizaun tinan 2 suspende ba tinan 3

Iha 25 Jullu 2023, Tribunál Judisiál Primeira Instânsia Baukau prezide julgamentu leitura sentensa ba krime omisídiu negligente ne'ebé envolve arguidu João Marques Freitas hasoru vitíma Julmira Freitas, iha Suku Uailili, Postu Administrativu Baukau Vila, Munisípiu Baukau.

Akuzasaun prokuradór

Prokuradór akuza katak iha 07 Fevereiru 2023, iha oras tuku 08:00 dadeer, arguidu sai husi uma atu ba óspital lori motor, bainhira arguidu to'o iha estrada públiku Uailili, arguidu hetan vítima hanesan professora ne'ebé hein hela kereta atu ba hanorin iha eskola Pre-Secundaria Uailili. Arguidu para tiha motor tula vítima sa'e tuir arguidu maibé momentu ne'ebá vítima la tau kapasete. Bainhira to'o iha estrada públiku besik eskola Pre-Secundaria Uailili, asu halai ka korta liu tuir estrada klaran, arguidu hakfodak la konsege kontrola motor, nune'e soke asu ne'e, resulta vítima monu tun husi motor ulun baku ba aspal halo raan sai barak. Arguidu la konsege monu, direta ajuda vítima tula ba mikrolet ida lori ba ospital Baukau, ikus mai la konsege salva lezada nia vida.

Prokuradór akuza arguidu kontra artigu 140 (1) KP, kona-ba krime omisídiu negligente ho nia moldura penal tinan 1 to'o tinan 4 ka pena multa.

Produsaun ba prova sira

Iha prosesu julgamentu, arguidu deklara katak faktu sira ne'e loos, momentu ne'e arguidu mós atu ba serbisu, to'o iha fatin refere arguidu hetan vítima, arguidu para motor tula vítima tamba nu'udar arguidu nia prima no arguidu haree oras mós besik hahú serbisu ona. Arguidu deklara katak momentu ne'e vítima la tau kapasete, to'o iha dalan besik eskola Pre-Sekundária Uailili nian, maka asu ida halai korta, nune'e arguidu soke asu ne'e, rezulta vítima monu, maibé arguidu la konsege monu. Momentu ne'e ema barak mak ba haree. Arguidu deklara katak nia halai ho velosidade normal, no nia rasik la espera atu akontese hanesan ne'e. Arguidu deklara mós katak antes ne'e nia sempre tula hela de'it vítima la'os foin primeiravés, hanesan vítima atu ba fatin rumu husu ajuda arguidu ba tula ka sai husi eskola mós arguidu ba tula. Arguidu nia motor rasik, dokumentus konpletu. Arguidu sira rezolve tiha ona ho família no iha mós akordu dame nian.

Testemuña Agusto Vicente Belo nu'udar vítima nia aman depoimentu katak vítima nu'udar nia oan rasik no arguidu nu'udar nia família ne'ebé mai husi avo ida de'it. Tanba ne'e ami la husu indemnizasaun tamba uma laran ida de'it maibé ami hamutuk halot matebian nia isin to'o hakoi.

Alegasaun finál

Prokuradór haktuir katak arguidu konfesa faktu hotu, tula lezada la uza kapasete no halai falta kuidadu motor soke asu no monu rezulta vítima mate arguidu provadu komete krime omisídu negligente tanba ne'e husu ba tribunál atu kondena arguidu ba pena prizaun tinan rua suspende ba tinan rua no arguidu mós apresenta motor nia dokumentu oriijinal hodi fori fali nia motor.

Enkuantu defeza haktuir katak arguidu konfesa, arepende ba nia hahalok. Arguidu mós la iha intensaun maibé falta kontrola velosidade, sira iha relasaun família ne'ebé besik no resolve entre família vitima ho arguidu. Tanba ne'e husu ba tribunál aplika pena admoestasaun ba arguidu.

Desizaun

Depoisde avalia faktu sira hotu, tribunál prova katak arguidu tula vítima ho motor la uja kapsete soke asu, rezulta vítima monu ba rai no mate liu. Tribunál la fixa indemnizasaun sivil tanba vitima nia aman rasik deklara iha tribunál katak la presija, sira família no hamutuk haloot ona vítima nia mate isin, tribunál deside atu arguidu bele foti nia motor

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

26. Krime ofensa ba integridade fizika simples ho natureza violénsia doméstika

Nú. prosesu : 0025/21.VQSIC

Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dr. Ambrósio Rangel Freitas
Defeza	: Dr. Gil Amaral (Advogado Privadu)
Desizaun	: Absolve

Iha 27 Jullu 2023, Tribunál Judisiál Primeira Instánsia Baukau prezide julgamentu leitura sentensa ba kazu ofensa integridade fizika simples ho natureza violénsia doméstika ne'ebé envolve arguidu EGM hasoru nia inan, iha Munisípiu Vikeke.

Akuzasaun prokuradór

Prokuradór akuza katak iha 24 Novembru 2021, iha oras tuku 08:00 dadeer, iha arguidu no lezada nia rezidensia lezada nia bei-oan fakar tiha lezada nia tua mutin iha kaneka laran, tanba ne'e lezada hirus nia bei-oan, nune'e lezada nia feto foun mai diskuti malu ho lezada, arguidu nervozu buti lezada nia ibun, dulas lezada nia kakorok no basa dala ida iha lezada nia hasan parte karuk.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penal too tinan 3 ka multa no konjuga artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak iha akuzasaun ne'e balu loos balu la loos. Tanba tuir arguidu katak iha altura ne'ebá arguidu haree lezada diskuti malu ho nia feto foun no lezada tolok nia feto foun, arguidu nervozu uza liman hodi taka lezada nia ibun, kous lezada tama ba uma laran.

Alende ne'e lezada deklara katak, lezada nia be-oan fakar tiha lezada nia tua mutin, hafoin lezada tolok no baku nia be-oan maibé lezada la istoria malu no la tolok nia feto foun, lezada mos deklara katak arguidu taka de'it lezada nia ibun no arguidu dehan *nonook tiha, ama keta tolok hanesan ne'e*, nune'e arguidu dada lezada tama ba uma laran.

Testemuña JFA nu'udar lezada nia feto foun depoimentu katak testemuña apenas rona sira diakute malu maibé la haree arguidu halo agresaun hasoru lezada no lezada haree bainhira nia oan foti kaneka sira ba tau iha basia laran tanba foer atu fase.

Alegasaun finál

Prokuradór haktuir katak arguidu práctica krime ofensa ba integridade fizika simples ho forma violénsia doméstika katak arguidu nega faktu balu, konfirma mós ho lezada katak arguidu la baku duni lezada, nune'e husu ba tribunál atu absolve.

Alende ne'e defeza iha nia alegasaun katak lezada la sente moras no arguidu iha intensaun atu taka lezada nia ibun hodi labele tolok tan lezada nia feto foun. Konkorda Prokurador nia alegasaun hodi absolve arguidu.

Desizaun

Depoisde avalia faktu sira hotu, tribunál konsidera faktu hotu la provadu, tanba iha produsaun ba prova arguidu ho lezada deklara katak arguidu lori liman taka lezada nia ibun para labele tolok tan, nune'e tribunál konklui prosesu ne'e no absolve arguidu husi prosesu ne'e.

27. Krime ofensa ba integridade física simples ho natureza violénsia doméstika

Nú. Prosesu	: 0033/22. BCQLC
Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dr. Ambrósio Rangel Freitas
Defeza	: Dr. António Fernandes
Desizaun	: Pena multa US\$30.00

Iha 31 Jullu 2023, Tribunál Judisiál Primeira Instánsia Baukau prezide julgamentu leitura sentensa ba kazu ofensa ba integridade fizika simples ho natureza violénsia domestika ne'ebé envolve arguidu JFS hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 11 Outubru 2022, iha oras tuku 22:00 kalan, arguidu uza kadeira masa baku dala rua iha lezada nia ulun rezulta kanek raan sai bubu no moras. Antes agresaun ne'e, arguidu ho lezada diskute malu kona-ba problema uma laran nian, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penal too tinan 3 ka multa no konjuga artigu 2, 3, 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak iha akuzasaun ne'e loos hotu, arguidu baku duni lezada depois lezada ba halo tratamentu saúde no hela iha uma mahon durante semana ida, diak malu ona, tanba antes ne'e arguidu nunka baku lezada no iha tribunál arguidu promete katak sei la baku tan lezada.

Alende ne'e, lezada kontinua konfirma faktu hotu iha akuzasaun, dadaun lezada ho arguidu moris hamutuk nafatin iha uma ida, sira iha oan na'in lima, lezada haktuir tan katak arguidu baku duni lezada uza kadeira masa iha lezada nia ulun, kotuk laran, rezulta kanek, raan no moras, agora dadaun lezada ho arguidu dame malu no di'ak malu ona.

Alegasaun finál

Prokuradór konsidera arguidu práтика krime ofensa ba integridade física simples ho natureza violénsia doméstika, katak arguidu konfesa integralmente no foin mak primeiravés arguidu halo agresaun hasoru lezada atu prevene arguidu labele kontinua ninia hahalok hasoru lezada, husu ba tribunál atu aplika pena multa US\$60.00 kada loron selu US\$1.00.

Entretantu husi parte defeza alega katak arguidu konfesa faktu hotu iha akuzasaun, hafoin lezada mós konfirma katak arguidu halo duni agresaun hasoru lezada, nune'e husu ba tribunál atu aplika pena ne'ebé justu ba arguidu.

Desizaun

Depoisde avalia faktu sira hotu, tribunál prova katak arguidu arguidu uza kadeira masa baku dala rua iha lezada nia ulun rezulta kanek raan sai bubu no moras.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, di'ak malu ona, arrepende ninia hahalok nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron, durante loron 30. Tribunál mós fiksa pena alternativa ba arguidu durante loron 20 prizaun, bainhira arguidu la kumpri pena multa refere.

28. Krime ofensa ba integridade física simples ho natureza violénsia doméstika

Nú. Prosesu	: 0004/23.BCLGA
Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dra. Remizia de Fatima
Defeza	: Dr. Geremano Guterres Ramos
Desizaun	: Pena multa US\$30.00

Iha 31 Jullu 2023, Tribunál Judisiál Primeira Instânsia Baukau prezide julgamento leitura sentensa ba krime ofensa ba integridade física simples ho natureza violénsia doméstika envolve arguidu CMdS hasoru nia feen, iha Munisípiu Baukau

Akuzasaun prokuradór

Prokuradór akuza katak 24 Janeiru 2023, iha oras tuku 16:00 loraik, arguidu silu lezada nia liman karuk halo moras no bok-an ladi'ak, buti lezada nia kakorok halo moras liman kukun fatin iha kedes no tuku dala rua iha lezada nia kaba'as parte loos. Antes agresaun ne'e, arguidu ho lezada diskute malu kona-ba lezada hetan arguidu ninia amante (*selingkuh*), ho nune'e mosu agresaun.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu arguidu hili direitu nonook. Iha parte seluk lezada konfirma faktu hotu iha akuzasaun no deklara katak agora lezada ho arguidu di'ak malu ona, moris hamutuk nafatin nu'udar feen ho la'en no lezada lakohi arguidu ba kadeia tanba atu haree lezada ho nia oan sira.

Alegasaun finál

Prokuradór haktuir katak maske arguidu hili nia direitu nonook maibé lezada konfirma akuzasaun sein rezerva, dala barak sira di'ak malu maibé akontese nafatin. Tanba ne'e husu ba tribunál atu kondena arguidu ba pena prizaun fulan neen suspende ba tinan ida hodi prevene arguidu nia konduta iha futuru.

Enkuantu husi parte defeza alega katak maske arguidu la ko'alia maibé ikus nia arrepende ba nia hahalok, no nafatin moris hamutuk ho lezada ho nia oan sira. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu silu lezada nia liman karuk halo moras no bok-an ladi'ak, buti lezada nia kakorok halo moras liman kukun fatin iha kedas no tuku tan dala rua iha lezada nia kabás parte loos.

Bazeia ba faktu provadu sira ne'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron, durante loron 30. Tribunál mós fiksa pena alternativa ba arguidu durante loron 20 prizaun, bainhira arguidu la kumpri pena multa refere.

29. Krime ofensa ba integridade física simples ho natureza violénsia domestika

Nú. Prosesu	: 0071/23.BCBCV
Kompozisaun Tribunál	: Singulár
Juis	: Dr. Jose Antonio d. Escurial
Prokuradór	: Dr. Ambrósio Rangel Freitas
Defeza	: Dr. António Fernandes
Desizaun	: Pena multa US\$30.00

Iha 31 Jullu 2023, Tribunál Judisiál Primeira Instánsia Baukau prezide julgamentu leitura sentensa ba kazu ofensa ba integridade física simples ho natureza violénsia doméstika ne'ebé envolve arguidu OSB hasoru nia feen, iha Munisipiu Baukau.

Akuzasaun prokuradór

Prokuradór akuza katak iha 27 Marsu 2023, iha oras tuku 07:30 dadeer, arguidu foti sira nia oan nia bibiron hodi tuda kona lezada nia ulun dala ida rezulta moras, hodi katana nia belar baku lezada nia kelen dala ida rezulta mean no moras, tuku dala ida lezada nia matan fukun parte karuk, lezada halai ba kuartu laran, arguidu ba tuir hodi buti lezada nia kakorok. Antes agresaun ne'e, arguidu ho lezada diskute malu kona-ba lezada nia matan mean nune'e husu ajuda ba arguidu atu ajuda ba ospitál maibé arguidu lakohi.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3 (a), 35 (b) LKVD.

Produsaun ba prova sira

Iha prosesu julgamentu arguidu hili direitu nonook. Entretantu lezada konfirma faktu hotu iha akuzasaun, agresaun ne'e lezada nia ulun moras, lezada nia kelen mean no moras, lezada nia matan fukun parte karuk metan, bubu no moras, nune'e lezada ba konsulta iha PRADET iha oras balu nia laran, depois lezada ba fali uma mahon hodi hetan tratamento saude durante semana ida, lezada haktuir tan katak liu semana ida lezada diak fali, hafoin arguidu rasik mak ba hasoru lezada iha uma mahon hodi ba fali sira nia uma.

Alegasaun finál

Prokurdór haktuir katak dadauk ne'e arguidu ho lezada di'ak malu ona no la baku malu ona, maibe prokuradór duvidas tanba arguidu la ko'alia, atu prevene arguidu nia hahalok iha futuru atu labele akontese tan hahalok hanesan hasoru lezada no membru família. Husu ba tribunál atu kondena arguidu ho pena prizaun tinan ida suspende ba tinan ida.

Alende ne'e parte defeza haktuir katak, bazeia ba produsaun prova hanesan arguidu hili direitu nonook, lezada ho arguidu diskuti malu tanba sosa oklu no atu ba konsulta matan moras (mean), lezada mós deklara katak sira di'ak malu ona. Tanba ne'e husu ba tribunál fó pena justu ba arguidu.

Desizaun

Depoisde avalia faktu sira hotu, tribunál prova katak arguidu uza bibiron tuda kona lezada nia ulun dala ida rezulta moras, hodi katana nia belar baku lezada nia kelen dala ida rezulta mean no moras, tuku dala ida lezada nia matan fukun parte karuk, lezada halai ba kuartu laran, arguidu ba tuir hodi buti lezada nia kakorok

Bazeia ba faktu provadu sira ne'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loran, durante loran 30. Tribunál mós fiksa pena alternative durante loran 20 prizaun, bainhira arguidu la kumpri pena multa refere.

30. Krime omisídiu negligente no kondusaun sein karta

Nú. Prosesu : 0004/22.VQSTR
Kompozisaun Tribunál : Singulár
Juis : Dr. Jose Antonio d. Escurial
Prokuradór : Dr. Julio da Silva Correia
Defeza : Dra. Laura Valente Lay
Desizaun : Pena prizaun tinan 2 fulan 6 suspende ba tinan 3

Iha 31 Jullu 2023, Tribunál Judisiál Primeira Instânsia Baukau prezide julgamentu leitura sentensa ba kazu omisidiu negligente no kondusaun sein karta, ne'ebé práтика husi arguidu Fransisco Soares hasoru vitima Lourença Jacinta Ximenes no Estadu RDTL, iha area Maukiak, Uatulari, Vikeke.

Akuzasaun prokuradór

Prokuradór akuza katak, iha 13 Febreiru 2022, iha oras tuku 17:00 otl, vitima Lourença Jacinta Ximenes la'o tuir estrada nia ninin parte karuk iha area Maukiak, Uatulari, Vikeke, arguidu Fransisco Soares konduz motorizada ida ho marka Honda Revo Fit ho numeru matrikula 2213 TL, husi direksaun Uaniuma atu ba iha area teka laran, maibe iha altura ne'ebá arguidu konduz motorizada ho velocidade no kuandu halai to'o iha area Maukiak, nia lakon kontrolu nune'e arguidu soke iha vitima nia kalilin parte karuk hafoin vitima monu tun hodi fahi nia ulun ba estrada. Arguidu desde fulan tolu ba kotuk, nia konduz motorizada maibe la iha karta kondusaun até soke vitima.

Konsekuensia nesesaria no direita husi arguidu nia hahalok ne'e konduz motorizada ho velocidade no falta kuidadu, resulta soke iha vitima nia kalilin nune'e vitima monu tun hodi fahi nia ulun ba estrada no vitima sofre kanek bo'ot iha nia ulun, ikus mai vitima mate iha ospital.

Prokuradór akuza arguidu kontra artigu 140 KP kona-ba omisidiu negligente ho moldura penal too tinan 4 ka multa no artigu 207 KP kona-ba kondusaun sein karta ho moldura penal too tinan 2 ka multa.

Produsaun ba prova sira

Iha prosesu julgamentu arguidu deklara katak faktu sira ne'e loos hotu, arguidu mak kondus duni motorizada ne'e, arguidu konfesa no arguidu foin aprende konduz motorizada fulan tolu, dadaun arguidu ho familia husi vitima ninian dame malu ona, nune'e arguidu ho familia husi vitima resolve no halo akordu katak arguidu iha responsabilidade ba vitima no ajuda mos ho osan US\$4000.00, dadaun arguidu ho familia husi vitima ninian diak malu ona.

Testemuña Xisto da Silva nia depoimentu katak vitima ne'ebé mak arguidu soke ne'e nu'udar testemuña ninia inan rasik, sira halo duni akordu no arguidu ajuda mos ho osan US\$4000.00 hodi halo vitima nia seremonia funevre no dadaun sira diak malu ona.

Alegasaun finál

Prokurdór iha alegasaun katak, bazeia ba iha faktu sira ne'e iha indisiu suficiente katak arguidu provadu komete krime omisidiu negligente no kondusaun sein karta, arguidu konfesa nia rasik mak konduz motorizada hodi soke vitima no ikus mate iha ospital, Tanba ne'e husu ba tribunál atu aplika pena unika tinan tolu suspende ba tinan hat no omologa akordu.

Enkuantu husi parte defeza alega katak, arguidu konfesa hotu faktu, hamate vitima, la iha karta kondusaun no arguidu fo apoiu osan US\$4000.00, nune'e husu ba tribunál fo desizaun ne'ebe mak justu ba arguidu.

Desizaun

Depoisde avalia faktu sira hotu, tribunál prova katak arguidu Fransisco Soares konduz motorizada ida ho marka Honda Revo Fit ho numeru matrikula 2213 TL, husi direksaun Uaniuma atu ba iha area teka laran, maibe iha altura ne'ebá arguidu konduz motorizada ho velocidade no kuandu halai to'o iha area Maukiak, nia lakon kontrolu nune'e arguidu soke iha vitima nia kalilin parte karuk hafoin vitima monu tun hodi fahi nia ulun ba estrada. Arguidu desde fulan tolu ba kotuk, nia konduz motorizada maibe la iha karta kondusaun até soke vitima. dadaun arguidu ho lezada sira sei familia, nune'e tribunál mos omologa sira nia akordu dame malu.

Bazeia ba faktu provadu sira ne'e no tetu mós sirkunstânsia atenuante sira hanesan foin primeiravés mai hatan iha tribunál, di'ak malu ona, arrepende ninia hahalok nune'e tribunál konkui prosesu ne'e no kondena arguidu ho pena omisídu negligente ba tinan rua prizaun, ba kondusaun sein karta fulan neen prizaun, pena unika tinan tinan rua fulan tolu suspende ba tinan tolu.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl